



古今攷卷之二十四

鶴山魏了翁華甫撰

紫陽方回萬里續

上海後學王圻校刊

功臣剖符

皇帝璽符節前已攷矣功臣剖符猶未為詳漢高未定天下先封王韓王信英布等書曰剖符天下既定又封列侯剖符故書始曰剖符師古曰剖破也與其合符而分授之也自先王以來有五瑞五玉所謂桓圭信圭躬圭穀璧蒲璧以合瑞五等諸侯來朝則執之去則還之周禮天子執冒圭四寸以朝諸侯冒之云者契勘圭璧無作偽者也禹會塗山執玉帛者萬國玉五玉

也此制既廢而秦有皇帝之符則郡守所剖而人主藏其半者乎漢因之

### 附周禮八節

周禮掌節掌八節陳祥道云玉節以玉為之以命數為大小守邦國者用玉節諸侯守其國者即與此節也又在五玉之外角節用犀角守都鄙者用角節角節其制未聞虎節人節龍節皆以金為之而象其形使山國土國澤國者異其用持之為信門關用符節半竹為之都鄙用管節全竹為之道路用旌節其制脩於符節管節飾以毛蘇武節旄盡落唐節度使建旌節又特侈大皆奉使所擁之物也又有貨賄用璽節即今之印章也

### 漢銅虎符竹使符

史記孝文本紀二年九月初與郡國守相為銅虎符竹使符漢書文帝紀二年九月初與郡守為銅虎符竹使符比史記去國相二字紫陽方氏曰讀史漢文章班固於馬讀注脚則漢書顏師古其尤也所以東萊夫事記本文多取史記注脚多引師古而不取索隱此注應劭曰銅虎符第一至第五國冢治兵遣使者至合符合符乃聽受之竹使符皆以竹箭五枚長五寸刻篆書第一至第五張晏曰符以代古之珪璋後簡易也師古曰與郡守為符者謂各分其半右留京師左以與之以上漢書注史記同而添索隱曰漢舊儀銅虎符發兵長六寸竹使符出入徵發說文云分符而合之小顏云右留京師左與之古今注云銅虎符銀錯書之張晏云銅取其同心也回謂張晏代古珪璋之

言是也高祖封功臣王侯所剖之符有云丹書鐵契別已攷

### 東萊論銅虎符

呂后之崩年齊王中尉給齊相召平曰王欲發兵非有漢虎符驗也東萊曰文帝以前蓋有虎符矣此謂初作者豈非用銅於此始乎○東萊又曰漢諸侯王兵權在相王不得自調發蓋相漢所置也若京師不下虎符則相亦不得自調發東萊又曰漢書止書郡守為銅虎符竹使符削國相二字紫陽方氏曰漢以符及節為信朱虛侯章附持節者車以入北軍則信之中有詐焉此齊王發兵不待虎符且并誘奪瑯琊王兵則亦難測也景帝七國反其發自以虎符為信大信結人心小信仗符節

### 孟子若合符節

孟子曰舜生於諸馮

云

得志行乎中國若合符節趙岐注節

玉節也周禮有八節

孫奭正義曰案周禮守邦國者用玉節守都鄙者用角節凡邦國之使節山國用虎節土國用人節澤國用龍節皆金也以英蕩輔之鄭注云以金為節鑄象也必自以其國所多者所以相別為信明也今漢有銅虎符杜子春云蕩當為帑謂以函器盛此節或曰英蕩畫函門關用符節貨賄用璽節道路用旌節注云符節如今宮中諸官詔符璽節者今之印章也旌節今使者所擁節是也將送者執此以送行者也

孟子朱文公集註符節以玉為之篆刻文字而中分之彼此各箴其半有政則左右相合以為信也紫陽方氏曰孟子所謂符

節周禮八節中有之所謂半竹為之者其是乎周禮雖劉歆為之所本遠矣故孟子有此符節之言後世一切廢之當攷自何時始自有紙之後方板竹策帛書曰符曰節曰傳一切皆廢部符下所屬紙也自一命以上至極品有官誥曰綬紙也省劄紙也人臣表章牋奏凡下達於上紙也人主制詔勅黃批荅凡上行於下紙也州縣百司行移紙也惟有印之一物匣之袂之而不佩無所謂古之組綬矣唐有鐵券以賜功臣有此碑本

### 英蕩

虎節人節龍節以英蕩輔之杜子春謂英蕩當作帑謂以函器盛此節陳祥道謂禹貢揚州貢篠蕩大射禮在建鼓之間則蕩竹也詩曰二矛重英朱英綠滕英飾也節之函以竹為之而有

飾焉先儒以為畫函是也紫陽方氏曰以器盛物謂之函今世有之英蕩之制廢矣

### 傳

周禮司關凡所達貨賄者則以節傳出之鄭氏曰商或取貨於民間無璽節者至關為之璽節及傳出之其有璽節亦為之傳傳如今移所過文書漢制門關用傳兩行書緇帛分持其一文帝十二年除之景帝四年又復之

### 緇

終軍入關關吏予軍緇陸晏曰緇音湏書帛裂而分之若券契蘇林曰緇帛邊也舊關出入皆以傳傳煩因裂帛頭合以為符信也師古曰蘇說是也軍問以此何為吏曰為復傳還當以合

符軍曰大丈夫西遊終不復傳還弃繻而去軍為謁者使行郡國建節東出關吏曰此前弃繻生也

申以丹書之信

功臣表曰申以丹書之信漢紀末曰與功臣剖符作誓丹書鐵契金匱石室藏之宗廟如淳曰謂功臣表誓使山如礪河如帶國乃滅絕又曰金匱猶金滕也師古曰以金為匱以石為室重緘封之保慎之義今按高帝封爵之誓曰使黃河如帶泰山如厲國以永存爰及苗裔凡十七字紫陽方氏曰剖符作誓丹書鐵契無注恐是以鐵鑄符如銅虎符以丹書此十七字於上而各剖一半乎既以鐵為版丹書此誓剖之則以金為匱以石為室而諸侯執左符所留右符皆藏之宗廟乎素問有金匱玉版

晁錯策亦云剖之玉版藏之金匱尚書有金滕古之文書懼其朽懼其焚欲垂久遠故謹嚴如此陳祥道謂老子曰執左契以不責於人則右留京師者非是今日賀太守啟劄必曰榮折左符久矣然高祖封功臣有王侯之符郡守未有符也郡守銅竹符自漢文始應劭曰國家欲使功臣傳祚無窮帶衣帶也厲砥厲石也河當何時如衣帶山當何時如厲石言如帶厲國猶永存以及後世之子孫也回謂陰陽消長寒暑往來有晝則有夜有生即有死有興則有亡詩書所云萬壽萬年人臣祝至尊萬歲即封爵永存之意也功臣表有云子孫驕逸殞身亡國訖于孝武靡有子遺又當以是觀之

重以白馬之盟

史記呂后本紀太后欲立諸呂為王問右丞相王陵王陵曰高  
帝刑白馬盟曰非劉氏而王天下共擊之今王呂氏非約也漢  
書見王陵傳帝紀無此事而史記無王陵傳功臣表中以丹書  
之信重以白馬之盟師古曰白馬之盟謂刑白馬而軟其血以  
為盟也軟色洽反所洽反啜也○紫陽方氏曰漢高刑白馬盟  
史漢帝紀不書在王陵傳非劉氏而王乃見其事不知歲月周  
禮有司盟之官有盟有詛荀卿與穀梁皆曰盟詛不及三王然  
周有此官玉府供珠盤以盛牛耳玉敦以盛血有桃有芻以祛  
不祥豐人飾犬盟牛牲司寇蒞盟書登之天府禮記曰蒞牲曰  
盟又曰周人作會而民始疑注會盟也詩曰君子屢盟亂是用  
長春秋書盟不一書同盟者于幽二馬陵戚虛打雞澤戲重丘

各一凡八也會盟于邾者凡一也盟而不地者凡三也

文二年  
三年十

三年書會及盟而不稱公者幽宿防齊翟泉晉慶父蘇子之女栗

宋向戌之劉各一凡八也孟子曰五霸桓公為盛葵丘之會諸

侯束牲載書而不軟血凡牲飾以文繡其殺也寘之於坎加書

其上盤盛耳敦盛血尸之者執耳大者先軟小者亞之左哀十

七年公會齊侯盟于蒙孟武伯彘執牛耳定八年晉侯盟衛侯

衛人請執牛耳陳陀成何控衛侯之手及腕史記毛遂取鷄狗

馬之血來奉銅盤跪進楚王曰王當軟血而定從於殿上遂左

手持盤右手招十九人軟堂下此長少先後之別也襄十一年

左傳瑕禽曰平王東遷吾七姓王賜之駢旄之盟杜預言重盟

不以鷄犬王者賜而後用又左傳鄭伯使卒出穀行出犬鷄以

詛射類考叔者此盟詛大小之別也鄭玄曰大事曰盟小事曰詛襄十一年季武子作三軍盟諸侯衡詛諸五父之衢定五年六年陽虎盟桓子於稷門而又大詛盟三桓於周社盟國入於亳社又詛於五父之衢此盟與詛之例也子任割臂以盟莊公則不用牲華元子反登牀之盟不用牲春秋耻城下之盟尋盟同盟乞盟要盟逃盟渝盟必誓之於神如襄十一年亳之盟桓所謂名山大川群神群祀先王先公七姓十二國之祖而誓之今世俗尚然有云發誓願者有云出惡語以詛說者獨不用牲耳漢高祖刑白馬非劉氏而王者天下共擊之則帝當先歃血而蕭曹之徒以次歃之歟史記作噓血盟使接反又云或作啣又章牒反漢書作啞血師古曰小歃也所甲反與蘇秦合六國

後刑白馬盟同視周人七姓驛旄之盟尤重矣桃今之桃樹枝葉蒨蒨帝也

附攷白馬盟出處

史記惠景間諸侯年表太史公讀列傳至便侯曰有以也夫長沙王者著令甲稱其忠焉鄧展曰漢約非劉氏不王如芮王故著令使特王或曰以芮至忠故著令也瓚曰漢以芮忠故特王之非制故特著令便侯音鞭吳芮也漢書吳芮傳其定著令下亦引鄧展注師古曰傳後贊文或說是也

右非劉氏不王出處二

史記無長沙王世家亦無吳芮傳別攷詳矣附此

正月丙午立劉賈等同姓四王

先是十二月執韓王信赦天下田肯賀上曰甚喜陛下得韓信  
又治秦中因論秦齊形勢謂齊地方二千里持戟百萬非親子  
弟莫可王齊者上曰善賜金五百斤○紫陽方氏曰田肯之賀  
有以發悟上心為大封同姓之始也異姓諸侯王表凡十八王  
項羽王西楚立十八王也羽誅齊王韓信徙楚尋廢為侯此一  
王無矣衡山王吳芮徙王長沙已死子嗣此一王存臨江王尉  
虜此二王無矣九江王英布此二王存常山王張耳改王趙已  
死子敖嗣此三王存代王趙歇滅矣此三王無矣陳餘亦滅矣  
齊臨菑濟北膠東三田王俱滅矣此六王無矣三秦王滅矣此  
九王無矣燕王臧荼滅十王無矣而盧縮王燕此四王存遼東  
王韓廣滅此十一王無矣魏王豹虜十二王無矣殷王司馬卬

降十三王無矣韓王成項羽殺之立鄭昌漢立韓王信十四王  
無矣而漢存五王河南王申陽降十五王無矣五王存之外有  
彭越王梁當此時異姓之王有六人吳芮子張耳子不足慮韓  
信已廢而英布彭越韓王信盧縮未可保也諸功臣未盡封徹  
侯也田肯有以啟高祖之心始大封王子弟故賞之金五百斤  
云

以故東陽郡鄆郡吳郡五十三縣立劉賈為荊王

功臣表曰賈高祖從父弟也荆燕吳傳荆王劉賈高帝從父兄  
也不知其初起時文穎曰東陽今下邳也鄆郡今丹陽也吳郡  
今會稽也韋昭曰鄆郡今故鄆縣也後郡徙丹陽轉以為縣故  
謂之故鄆也師古曰障音章東萊曰漢地理志下邳屬東海郡

即秦剡郡既已封楚王交當是秦漢之間分割下邳為東陽郡其詳不可攷也鄣郡所治乃湖州長興縣故城在縣西南八十里今建康地徽宣太平廣德皆鄣郡之境也吳郡所治乃平江府今常秀杭越明台婺温處衢潤湖睦皆吳郡之境也○紫陽方氏曰漢地理志會稽郡秦置高帝六年為荆國十二年更名吳然六年正月丙午劉賈之封不曰會稽郡而曰吳郡何也豈斑固追書而後改名耶秦置會稽郡漢統縣二十六治吳縣今平江府是也嚴助傳書會稽吳人朱買臣傳書吳人蓋皆今平江府人買臣武帝時拜會稽太守即今平江府人治吳縣之會稽非今浙東越州之會稽也劉賈傳立為荆王王淮東不治吳郡之吳縣漢志臨淮縣有東陽縣在淮浦盱眙淮陰縣之間必

立於此賈立六年高祖十一年黥布反賈戰弗勝走臨淮郡之富陵縣為所殺無子國除高祖十二年十月以會稽吳封兄仲之子濞為吳王王三郡五十三城史記書曰郡吳治今平江府吳縣其傳謂豫章郡銅山鑄錢韋昭注豫字誤但當言章郡今改章古字通用晁錯削濞會稽郡則吳王所都亦取之矣故反反而滅三郡入漢則吳郡之後為會稽郡其在此時歟丹陽郡統縣十七皆今浙西江東地有故鄣縣即鄣郡有曰黥縣曰歙縣回所居徽州今二縣古名猶存黥音伊今寫曰黥會稽郡則浙西浙東地皆是朱買臣之負薪為郡皆浙西吳地東陽所屬臨淮郡則淮東地皆是賈荆王交楚王所謂分楚地為二國也

以碭郡薛郡郟郡三十六縣立弟文信君交為楚王

楚元王傳楚元王交字游高祖同父少弟也文穎曰碭郡今梁國是也薛郡今魯國是也郟郡今東海是也傳曰王薛郡東海彭越三十六縣東萊曰碭郡所治乃單州碭山縣今應天興仁鄆濟單毫廣濟皆碭郡之境也薛郡所治乃兗州僊源縣今兗海淮陽皆薛郡之境也郟州所治乃海州東海縣秦分薛郡東海及旁郡地置郟郡如沂州之費縣淮陽軍之下邳縣皆其境也○紫陽方氏曰回嘗至今兗州州治無屋數碑立瓦礫中前宋太守題名猶在居民無數十戶東望孔子墓林蔚然豐茂泰山巍乎其巔欲壓平野而曠土荆棘罕積野雉飛雉其卵可拾驟馬逐之三起三落即得雉矣元王交少時嘗與魯穆生白生申公俱受詩於浮丘伯伯者荀卿門人也一時間氣鍾劉氏一

門高祖之武元王之文偉執惜乎申公無詩元王詩今不傳也高祖四兄弟

太上皇生高祖 長兄伯早 次兄仲即代 少弟交字游即

郟客 文王禮 劉辟疆劉德劉向劉歆 夷王 王戊 從滯反自殺

壬子以雲中鴈門代郡五十三縣立兄宜信侯喜為代王

紫陽方氏曰宜信侯喜為代王即高祖兄仲也漢書無傳事見吳王濞傳中功臣表六年正月壬子立七年為匈奴所攻棄國自歸廢為郟陽侯孝惠二年薨子吳王濞高祖十二年十月辛丑以故代王子沛侯立為吳王立四十二年孝景三年反誅濞傳高帝兄仲之子也高帝立仲為代王匈奴攻代仲不能堅守

棄國間行走洛陽天子不忍致法廢為郟陽侯子濞起為沛侯  
年二十從高祖破黥布荆王劉賈為布殺無後上患會稽吳輕  
悍乃立濞為吳王

東萊曰雲中唐勝州單于大都護是也鴈門唐雲應朔州是也  
代郡唐蔚州是也史記本紀載喜為代王十七年漢興以來諸  
侯年表雖書喜元年於六年與漢書同然謂韓王信降匈奴而  
喜繼王其地二者皆非也漢書本紀年表載封拜年月日郡名  
縣數皆具蓋故府之所歲也况喜所王者雲中鴈門代三郡信  
所王者太原一郡自不相干史記之誤明矣然所以差誤者亦  
有說焉高帝更以太原郡為韓國徙信以避胡都晉陽信上書  
國被邊匈奴數入晉陽去塞遠請治馬邑上許之馬邑據地理

志屬代郡在高帝時或屬太原未可知也至高帝十一年封文  
帝為代王頗取山南太原之地以益屬代是割韓王信之故地  
以增益代國也自後世觀之韓之都乃在代之縣代之地乃涉  
韓之舊疆也子長論輿地之大勢封建之大意固非孟堅所及  
至於總練故實考核歲月則孟堅之所長也○紫陽方氏曰回  
嘗謂馬踈而意有餘班密而見不足者此也

以膠東膠西臨淄濟北博陽城陽郡七十三縣立子肥為齊王  
東萊曰肥惠帝庶兄庶長子也膠東所治乃萊州即墨縣膠西  
所治乃密州高密縣臨淄所治乃青州臨淄縣濟北博陽所治  
未見項羽立田安為濟北王治博陽今分為兩郡蓋在田榮并  
三齊之後城陽所治乃密州莒縣今登萊沂密濰青淄濱滄棣

濟德博皆六郡之境也

紫陽方氏曰田肯一言寤主謂非親子弟莫可王齊者蓋亦窺見高祖之心奪韓信齊而易之楚信未改封入壁奪其軍忌之甚矣既而不以齊封諸人以為郡不欲以重地與人也其擒信於陳奪其楚地信本不反忌之而欲除之也所謂楚亦未肯與人也田肯發其端惟以得信為賀而次言齊地宜封子弟高祖之疑於中者遂決詔曰齊古之建國也今為郡其復以為諸侯將軍劉賈數有大功及擇寬惠修潔者王齊荆地此詔甚典雖止言劉賈疏屬一人群大臣心知其指矣遂奏請劉賈王荆元王交王楚分楚為二其曰正月丙午又七日壬子立代王喜齊王肥先從姪次少弟次仲兄最後親庶長子其實雅意在立子

肥為齊王也故又以曹參為齊相焉大封同姓自此四王始漢表書楚第一代第二齊第三荆第四高祖王子弟實十二人代王喜廢為侯子濞以劉賈戰死之地封為王表惟書十一人史記漢興以來諸侯表序甚佳表微不同如東萊之言取漢表

高祖封同姓王十二人除此四王外又八王

初四王荆王賈楚元王交代王喜齊悼惠王肥

淮南厲王長高帝子十一年正月庚午立孝文六年謀反廢死後立子劉安

趙隱王如意高帝子九年四月立十二月為呂太后所殺無後代王高帝子漢文帝也諱恒十一年正月丙子立十七年高后八年入為皇帝

趙共王恢高帝子十一年三月丙午為梁王立十六年高后七年徙趙其年自殺無後

趙幽王友高帝子十一年三月丙寅立為淮陽王二年徙趙十二年高后七年自殺子遂文帝元年封景帝三年反誅子辟

疆文帝二年封河間王

燕靈王建高帝十二年二月甲午立十五年高后七年薨殺其子

燕敬王澤高帝從子昆弟高后七年以營陸侯立為瑯琊王二年文帝元年徙燕漢書荆燕吳傳劉賈劉澤劉濞也澤最疎

非高祖之封

吳王濞高祖孫代王喜之子也喜棄國赦為郃陽侯高祖立為

吳王立四十二年景帝二年反誅

紫陽方氏曰高帝八男惠文二帝高五王傳一齊三趙一燕也淮南王長自為傳

史記秦漢之際月表

太史公讀秦漢之際曰初作難發於陳涉奇句文 虐戾滅秦自項

氏奇句文 撥亂誅暴平定海內卒踐帝祚成於漢家此四句謂高祖文奇 五

年之間號令三嬪音善索隱曰古禪字市戰反 自生民以來未有受命若斯

之亟也此第一節言陳項劉三人之興文奇 昔虞夏之興積善累功數十年德洽

百姓攝行政事薦之於天然後在位湯武之王乃由契后稷脩

仁行義十餘世不期而會孟津八百諸侯猶以為未可其後乃

放弑上文總言湯武中舉孟津事正謂武王 秦起襄公章於文

繆獻孝之後稍以蚕食六國百有餘載乃能并冠帶之倫論三

夏湯武秦以德若彼回曰此謂用力如此回曰此謂秦蓋一統若斯

之難也此第二節言五秦既稱帝患兵革不休以有諸侯也於

是無尺土之封墮壞名城銷鋒鏑鉏豪傑維萬世之安然王跡

之興起於閭巷合從討伐軼於三代鄉秦之禁適足以資賢者

為驅除難耳此第三節故憤發其所為 天下雄索隱曰指高

始於閭巷回曰項安在無土不王此乃傳之所謂大聖乎豈非

天哉豈非天哉非大聖孰能當此受命而帝者乎○紫陽方氏

曰子長十表自我作古秦楚之際月表自秦二世元年壬辰七

月始其次第秦楚趙項齊漢燕魏韓七月陳涉起九月兵至戲

二年癸巳十二月陳涉死九月項梁起八月武臣自立為趙王

九月田儋王齊是月漢王為沛公起是月韓廣王燕是月魏咎

始二年六月韓王成始其書簡而有法此二年癸巳有後九月

漢紀三年甲午盡九月乙未十月為漢元年沛公破咸陽于嬰

降十一月項羽坑秦降卒於新安十二月羽至關中誅子嬰正

月為楚義帝元年項羽為天下主分十八王義帝都江南郴羽

為西楚霸王都彭城而楚分為四吳芮衡山王都邾共敖臨江

王都江陵九江王英布都六趙更名常山張耳常山王都襄國

分為代趙歇代王都代齊更臨菑田都臨菑王都臨菑分為濟

北田安濟北王都博陽分為膠東田市膠東王都即墨此齊三

田也關中分為四漢王都南鄭章邯雍王都廢丘塞王司馬欣

都櫟陽程王董翳都高奴燕王臧荼都薊分為遼東王韓廣都

遼東魏更為西魏王魏豹都平陽分為殷王司馬卬都朝歌韓  
王成都陽翟分為河南王申陽都洛陽至漢五年一月止其一  
月或書曰端月通項羽十九王虛尊義帝一帝

古今攷卷之二十四終

古今攷卷之二十五

鶴山魏了翁華甫撰

紫陽方 回萬里續

上海後學王圻校刊

漢書異姓諸侯王表

始漢元年不書義帝其次序楚分為四至韓分為二凡十八王  
高祖為帝後追書漢元年為一王也

孟堅表曰昔詩書述虞夏之際舜禹受禪積德累功洽於百姓  
攝位行政考之于天經數十年然後在位殷周之王乃繇高稷  
修仁行義歷十餘世至於湯武然後放殺秦起襄公章於文繆  
獻孝昭嚴回曰子長云秦起襄公章於文繆獻孝昭嚴而章之下次一於字似欠

法活稍蚕食六國百有餘載至始皇乃并天下以德若彼用力若此其艱難也秦既稱帝患周之敗以為起於處士橫議諸侯力爭四夷交侵以弱見奪於是削去五等墮城銷刃箝語燒書內鉏雄俊外攘胡越用一威權為萬世安然十餘年間猛敵橫發乎不虞適戍強於五伯閭閻偏於戎狄嚮應瘠於謗議奮臂威於甲兵鄉秦之禁適所以資豪傑而速自斃是以漢無尺土之階繇一劔之任五載而成帝業書傳所記未嘗有焉何則古世相革皆承聖王之烈今漢獨收孤秦之弊鑄金石者難為功摧枯朽者易為力其勢然也故據漢受命譜十八王月而列之天下一統乃以年數迄於孝文異姓盡矣

紫陽方氏曰子長之文痛快孟堅之文補綴雖造語工不及子長抑揚嗟嘆意味有餘也其謂虞夏殷周秦積累而後興子長本意也子長先言陳涉項羽高祖所以驟興最有意次敘五代之興必悠久艱難而始皇患兵革不休以有諸侯於是無寸尺之封而欲圖萬世之安陳涉之所以起也項羽之所以起也作難二字貶涉虐戾二字貶羽而撥亂誅暴四字稱高祖此不惟見高祖之驟興承秦之弊亦以見涉羽為漢驅除彼皆不仁而漢獨仁故也孟堅之文密不如子長之文疎也發此一例學者當細攷之

史記漢興以來諸侯年表

索隱曰應劭云雖名為王其實如古之諸侯○紫陽方氏曰子長作漢興以來諸侯年表不書曰諸侯王故索隱引應劭注如

此孟堅乃為異姓諸侯王表同姓者單曰諸侯王表只此一著子長高於孟堅多矣

論史記諸侯年表漢書諸侯王表之異

子長表曰殷以前尚矣周封五等公侯伯子男然封伯禽康叔於魯衛地各四百里親親之義褒有德也太公於齊無五侯地尊勤勞也武王成康所封數百而同姓五十五地上不過百零下三十里以輔衛王室管蔡康叔曹鄭或過或損厲幽之後王室闕侯伯疆國興焉天子微弗能正非德不純形勢弱也

紫陽方氏曰子長此一節意謂周之封建魯衛地多以親親褒有德太公地多以尊勤勞皆非常也他所封數百同姓五十五地上不過百零下三十里乃當然也厲幽之後侯伯疆國興焉

天子微弗能正周之德亦未衰而平王東遷形勢弱矣故侯伯疆國興而周衰微嘆周之東不能強榦而弱枝也乃後歷敘漢事諸侯地大者或五六郡連城數十置百官宮觀僭於天子漢獨有三河至內史十五郡公主列侯頗邑其中嘆夫法之未善也故曰天下初定骨肉同姓少廣疆庶孽高祖之權宜也於是再論漢興百年之間諸侯踈厲驕奢淫亂叛逆不軌殞身亡國然後天子觀於上古推恩分子弟國邑諸侯稍微大國不過十餘城小侯不過數十里而漢郡八九十犬牙相錯強本榦弱枝葉故曰尊卑明而萬事各得其所矣敘漢初至武帝大初年間諸侯為一表謂初封之地大廣非悠久之計叛逆亡隕分王子弟之後漢始有八九十郡而諸侯微此東萊所謂論封建之大

意非孟堅所及者也孟堅表意全反此

孟堅表曰昔周監於二代三聖制法立爵五等封國八百同姓

五十有餘周公康叔建於魯衛各數百里太公於齊亦五侯九

伯之地所以親親賢賢褒表功德關諸盛衰深根固本為不可

拔者也回謂改子長意而用其事全相反子長以齊魯衛地大廣為非故盛則周召相其治致

刑錯此亦非周之太平周召為相之力非諸侯之力二公不之國衰則五伯扶其弱與共守

有迺責之臺被竊鉄之言然天下謂之共主疆大弗之敢傾既

於王赧降為庶人用天年終號位已絕於天下尚猶枝葉相持

莫得居其虛位海內無主三十餘年此孟堅稱美諸侯所以衛周之

不知地大上僭亦所以亡國

孟堅又曰秦據執勝之地騁狙詐之兵姍笑三代盪滅古法竊

自號為皇帝而子弟為匹夫內無骨肉本根之輔外無尺土藩

翼之衛陳吳奮其白挺劉項從而斃之此謂秦廢封建而暴亡

弟及侯國亦亡

孟堅又曰漢興之初海內新定同姓寡少懲戒亡秦孤立之敗

功臣侯者百有餘邑尊王子弟大啟九國天子自有三河至內

史凡十五郡公主列侯頗邑其中而藩國大者夸州兼郡連城

數十宮室百司同制京師可謂矯枉過其正矣回謂矯枉過其

全文畧改于長語而意不同孟堅又曰然高祖創業日不暇給孝惠享國日淺高后女主攝

位而海內晏如亡狂狡之憂卒折諸呂之難成太宗之業者亦

賴之於諸侯也

回謂折諸呂之難乃平勃交權之力朱虛侯之初心在齊非灌嬰連衡齊適為京師患耳七國

之變政以渾國大盛却不言及

紫陽方氏曰孟堅之言雖敘事本末如子長意却不然子長之意欲衆建諸侯而少其力天子之地大諸侯之地小則上足以制下孟堅顧謂漢祖封諸侯雖矯枉過正折諸呂之難成太宗之業亦賴諸侯殊不知諸呂之誅非全是諸侯之力晁錯為景帝忠謀而踈斬之以謝七國而吳濞無上之心不輟非周亞夫絕其糧道濞不敗也所謂文帝采賈生之議分齊趙景帝削吳楚武帝施主父之策下推恩之令齊趙梁淮南之分皆文子長語而失子長之意至謂武有淮南衡山之謀作左宮之律設附益之法諸侯惟得食衣租稅至於哀平與富室亡異而王莽生

其姦心遂據南面之尊漢諸侯王厥角稽顙奉上璽鞞豈不哀哉回竊惟王莽假母后之勢以篡國乃元成哀帝積弱而無剛德孔光張禹之徒有以成之孟堅乃謂分王子弟左官附益之制有以弱諸侯於外而生大姦於內愚意決不敢謂之然也此前輩先儒所以不與班史謂其不如遷史也

### 齊趙梁淮南之分

漢表武帝施主父之策下推恩之令使諸侯王得分戶邑以封子弟不行黜陟而藩國自折齊分為七師古曰謂齊城陽濟北濟南淄川膠西膠東也趙分為六謂趙平原真定中山廣川河間也梁分為五謂梁濟川濟東山陰濟陰也淮南分三謂淮南衡山廬江○紫陽方氏曰齊悼惠王肥最盛九子為王哀王

襄嗣至子絕孝王將問治封立孫絕城陽景王帝以朱虛侯立  
傳十世絕濟北王興居以東牟侯立二年謀反誅淄川懿王志  
以安都侯祈為濟北王後改封淄川傳九世絕淮南王辟光淄  
川王賢膠西王卬膠東王雄渠皆與七國同反誅城陽景王章  
有功最遠九王而武王以謀反誅

以曹參為齊相國

東萊曰按本傳高祖以長子肥為齊王庶長子也而以參為相國齊  
七十城七十縣天下初定悼惠王富於春秋參盡召長老諸先生  
問所以安集百姓者而齊故諸儒以百數言人人殊參未知所  
定聞膠西有蓋公善治黃老言使人厚幣請之既至蓋公為言  
治道貴清靜而民自定推此類具言之參於是避正堂舍蓋公

焉其治要用黃老術故相齊九年齊國安集大稱賢相參入相  
漢屬其後相曰以齊獄市為寄慎勿擾也後相曰治無大於此  
者乎參曰不然夫獄市者所以并容也今君擾之姦人安所容  
乎○紫陽方氏曰參本沛獄掾後沛公起百戰將也而知學問  
乃如此孝惠二年入相故相齊九年惠帝除諸侯相國更為齊  
丞相黥布反參從悼惠王將車騎十二萬與高祖會擊黥布軍  
大破之齊七十三縣軍興車騎十二萬衆強夫之國也宜高祖  
以愛子信臣鎮之參文武全才所謂黃老之學別攷

以大原郡三十一縣為韓國徙韓王信都晉陽

韓王信故韓襄王孽孫也長八尺五寸沛公使張良以韓司徒  
狗韓地得信從漢王入漢中說曰士卒皆山東人竦而望歸及

其鋒東鄉可以爭天下漢王還定三秦乃許王信拜為韓太尉  
畧韓地急攻韓王鄭昌昌降立信為王信與周苛守滎陽楚拔  
之信降楚已亡歸漢漢復以為韓王從破項籍與韓剖符王穎  
川六年春以信壯武天下勁兵處以大原郡為韓國徙都晉陽  
信上書徙馬邑匈奴冒頓大入信數使使求和解上賜書責讓  
之恐誅以馬邑降匈奴七年冬上自往擊之有白登之圍具見  
信傳

作元功十八人位次

漢書功臣表於重以白馬之盟後書曰又作十八侯位次不書  
何年孟康曰唯作蕭何元功十八人位次耳高后乃詔作位次  
下竟師古曰謂蕭何曹參張敖周勃樊噲酈商奚涓夏侯嬰灌

嬰傅寬斬歙王陵陳武王及薛歐周昌丁復盡達從第一至十  
八下文曰高后二年復詔丞相陳平盡差列侯之功錄第下竟  
歲諸宗廟副在有司

紫陽方氏曰東萊大事記書此在高帝六年定功行封之後偶  
接續書之耳非此年也張敖位次第三史記表曰張耳為常山  
王走歸漢漢定趙為王卒子敖嗣漢六年春也漢九年四月坐  
相貫高為不善廢為宣平侯則焉得六年已定位次為元功列  
侯之三乎今史詳書于后

鄼侯蕭何第一

平陽侯曹參第二

宣平侯張敖第三

絳侯周勃第四

舞陽侯樊噲第五

曲周侯酈商第六

魯侯奚涓第七

汝陰侯夏侯嬰第八

穎陰侯灌嬰第九

陽陵侯傅寬第十

信武侯靳歙第十一

安國侯王陵第十二

棘蒲侯陳武第十三

清河侯王吸第十四

廣平侯薛歐第十五

汾陰侯周昌第十六

陽都侯丁復第十七

曲城侯蠡達第十八

東萊曰張敖以高帝九年廢王為侯蓋今年有詔作元功十八人位次及位次之定乃在九年以後也顏師古曰張敖無大功以魯元之故呂后曲升之也東萊又曰高后二年詔丞相陳平盡差列侯之功錄第下竟然則自十九以下皆平所定也平之第在四十七其自處固善而留侯之第尚在六十二何耶蓋平

以智自恃固不與功臣爭先若留侯澹然事外雖序曲逆之前亦所不願也高帝深諒其雅意在當時必畧有定次至高后世特因其舊而銓品之耳

紫陽方氏曰所謂位次者何也朝班有定序如丞相大尉之類有一定之班而列侯無官職入朝則不可以無先後之班上殿侍宴則不可無次序之坐所以因其功之高下而次序之也當時雜亂失次豈惟班序未定六年春剖符封侯亦止三十餘人耳高祖之封侯至一百四十七人表書百五十三人淮陰侯無位次以十一年謀反誅也芒侯耐矜跽無位次以六年封二年薨無後也陽夏侯陳豨無位次以十二年謀反誅也元功十八人位次必在張敖廢王為侯之後其百餘人之位次則在高后

二年且高祖六年尚有長沙王吳芮趙王張敖燕王盧縮九江王英布梁王彭越韓王信王爵貴於侯獨無位次乎同姓王為一班異姓王為一班功臣列侯為一班必各有位次謂十八人定於高帝六年張良陳平何以不在位次之列其列侯之未封者源源而來當是盡高祖之世但定訖十八人位次陳平張良不爭高后時定位次則反而誅者與早死者無位次也張蒼計相位次六十五呂馬童位次一百一同取項羽王翦楊喜呂勝百二百三百四張相如一百一十八恐又是以先後封論嗚呼士大夫爭名爭利絲毫必計千古一瞬今安在哉

雍齒汁防侯

音地名

汁防音什方史記表如此寫或但書曰什方地屬廣漢其位次

五十七傳五世○紫陽方氏曰世有人主所怨而不死者乎漢高祖萬乘之貴不能必殺雍齒乃從而封之是故君子知命

諸侯得自除御史大夫群卿以下如漢朝

紫陽方氏曰回續魏鶴山古今攷用漢書帝紀為題而所引書不一偶參用呂東萊大事記凡解釋漢事為題不專用帝紀也非其時而事出前後代則曰附攷附論此一節東萊取漢書齊悼惠王傳贊為題○東萊解曰高五王傳贊曰悼惠之王齊最為大國以海內初定子弟少激秦孤立無藩輔故大封同姓以填天下時諸侯得自除御史大夫郡卿以下衆官如漢朝漢獨為置丞相自吳楚誅後稍奪諸侯權左官附益阿黨之法行其後諸侯惟得衣食租稅貧者或乘牛車○史記齊悼惠王世家

太史公曰諸侯大國無過齊悼惠王以海內初定子弟少激秦之無尺土封故大封同姓以填萬民之心及後分裂固其理也○史記五宗王世家太史公曰高祖時諸侯皆賦徐廣曰國所出賦皆入於王得自除內史以下漢獨為制丞相黃金印諸侯自除御史廷尉宗正博士擬於天子自吳楚反後五宗王世漢為置二千石去丞相曰相銀印諸侯獨得食租稅奪之權其後諸侯貧者或乘牛車也○紫陽方氏曰五宗王者景十三王也孟堅合兩世家贊為高五王傳贊子長所謂大國無過齊悼惠王惡其過制也又云及後分裂固其理也言過制之事不可久遠也所謂諸侯皆賦亦惡諸侯全有國賦也當是時惟吳王濞尤富鑄山煮海塩鐵既饒不賦於民遂生叛心除更一事漢獨置相而已此

尤子長所惡也吳楚叛後奪之權貧者牛車之嘆譬如父子驕子至其不肖狼狽無及於教誨矣此意皆高孟堅之意其

作左官之律

漢諸侯王表景遭七國之難抑損諸侯減黜其官武有衡山淮南之謀作左官之律設附益之法服虔曰仕於諸侯為左官絕不得使仕於王○應劭曰人道尚右今捨天子而仕諸侯故謂之左官也師古曰左官猶言左道也皆僻左不正應說是也漢時依上古法朝廷之列以右為尊故謂降秩為左遷仕諸侯為左官也○紫陽方氏曰如王國人不得入宿衛是也古尚右故主人坐東面西曰左賓坐西面東曰右儀禮公食大夫禮公坐其中主人者為公主此客任賓主百拜酒三行之勞坐其左而

尊賓於右今世人入門分左右主坐左客坐右猶尊客也而自唐以來左相班右相之上如近世時亦然尚書左丞班右丞之上左右正言司諫皆先左後右又以有出身文官為左後去之漢置左右內史左馮翊右扶風則尚左矣今日始又尚右右丞相左丞相中書左丞右丞是也

### 設附益之法

張晏曰律鄭氏說封諸侯過限曰附益或曰阿媚王侯有重法也師古曰附益者蓋取孔子云求也為之聚斂而附益之之義也皆背正法而益於私家也

### 諸侯王初置金璽蓋綬

百官公卿表諸侯王高祖所置師古曰蔡邕云漢制皇子封為

王其實諸侯也周末諸侯或稱王而漢天子自以皇帝為稱故以號加之總名諸侯王也金璽蓋綬音庚別攷掌治其國有大傅輔王內史治國民中尉掌武職丞相統衆官群卿大夫都官如漢朝景帝中五年令諸侯王不得復治國天子為置吏改丞相曰相省御史大夫廷尉少府宗正博士官大夫謁者郎諸官長丞皆損其負武帝改漢內史為京兆尹中尉為執金吾郎中令為光祿勳故王國如故損其郎中令秩千石改大僕曰僕亦千石成帝綏和元年更令相治民如郡太守中尉如郡都尉○紫陽方氏曰此表所書比東萊所引高五王傳贊詳甚故特書之

### 附攷璽印組綬

公卿百官表相國丞相大尉太傅大師大保前後左右將軍大

司空金印紫綬武帝宣帝大司馬無印綬成帝初賜哀帝去之  
又復御史大夫銀印青綬成帝更名大司空改金紫哀帝復為  
御史大夫諸侯王金璽蓋綬如淳曰蓋音戾綠也以祿為質晉  
灼曰蓋草名也出瑯琊平昌縣似艾可染綠因以為綬名也師  
古曰晉說是也璽之言信也古者印璽通名今則尊卑有別漢  
舊儀去諸侯王金璽橐佗鈕文曰璽謂刻云某王之璽  
凡吏秩比二千石以上皆銀印青綬師古曰漢舊儀云銀印皆  
龜鈕其文曰章謂刻曰某官之章也光祿大夫無

秩比六百石以上皆銅印黑綬大夫博士御史謁者郎無其僕  
射御史尚書尚符璽者有印綬

比二百石以上皆銅印黃綬師古曰漢舊儀云六百石四百石  
至二百以上皆銅印鼻鈕文曰印謂鈕但作鼻不為蟲獸之形  
而刻文曰某官之印成帝綬和三年長相皆黑綬哀帝建平二  
年復黃綬

朱買臣傳拜會稽太守衣故衣懷其印綬步歸郡邸守邸與共  
食少見其綬引其綬視其印會稽太守章也

昌邑王傳受皇帝璽綬霍光傳光曰皇太后詔廢安得天子廼  
即持其手解脫其璽組奉上太后○紫陽方氏曰高祖紀秦王  
子嬰封皇帝璽符節降軹道旁曰璽曰符曰節前已詳攷而論  
之矣今璽印組綬亦不可不攷如后

禮記玉藻古之君子必佩玉君子無故玉不去身天子佩白玉  
而玄組綬公侯佩山玄玉而朱組綬大夫佩水蒼玉而純鄭玄

為緇

組綬世子佩瑜玉而綦組綬士佩璠而充玟文而緼組綬鄭玄注綬者所以貫佩玉相承受者也純當作緇或作系旁才綦文雜也孔子佩象環五寸而綦組綬正義孔子以象牙為環廣五寸以綦組為綬也失魯司寇謙不復佩德佩及事佩示已無德事也象牙有文理言已有文章而為環者示已文教所循環無窮也回謂佩古宗廟冕服朝覲弁服皆有左右玉佩秦廢之而經傳佩之可攷者陳祥道禮書備矣自秦及漢璽印組綬之法亦可攷而組綬二字祖於古之玉佩而不同故著之古人玉佩不惟宗廟朝覲有之而燕居亦然玉藻所謂無故玉不去身乃燕私之佩非祭服之佩朝服之佩也後世印綬則秦漢君臣無時而不佩於身此尤異於古而秦法佩玉帶劔乃左帶劔右佩

印綬故有曰左右劔佩相當荆軻之變秦王帶劔則人主坐殿亦左帶劔右佩璽綬也群臣曰王負劔者呼令秦王移所帶劔負之於背則一拔而出也蕭何帶劔履上殿則宰相亦左帶劔右佩印綬也漢儀諸臣帶劔至殿階解劔晉世始代之以木則知兩漢群臣皆帶劔佩印綬此制之廢又當別攷

印劉熙釋名印信也所以封物為驗也亦言因封物相因付也漢舊儀璽皆白玉螭虎紐曰皇帝行璽皇帝之璽皇帝信璽天子行璽天子之璽凡六璽又有秦傳國璽不知霍光脫昌邑王璽組果何璽也或謂天子璽方四寸則如之何佩之亦大重矣璽書二字初見季武子取卞使公治問襄公璽書追而與之鄭松皆曰璽印也偶讀漢淮陽王傳璽書謝奏有詔策二字書即

詔也以竹策書之而以天子玉璽封之也

侯董巴輿服志曰戰國解去綬佩留其絲綬以為章表秦乃以綵組連結於綬光明章表轉相結綬故曰綬乘輿黃赤綬四采黃赤縹緋純黃圭長二丈九尺五百首太皇太后皇太后皆同又漢官儀乘輿綬黃地骨白羽青絳綠五岳四百首長二丈二尺王赤綬一等諸國貴人相國主公封君丞相御史大夫匈奴綠綬又一等九卿中二千石二千石青綬或青綬又一等自青綬已上逆音逆皆長三尺二寸與綬同采而首半之逆者古佩綬也佩綬相迎受故曰逆紫綬之間得施玉環玦千石六百黑綬又一等四百至百石黃綬又一等回初讀頗難曉以汴京刊本初學記及陳祥道禮書細攷然後知凡先合單紡為一

絲四絲為一扶五扶為一首五首成一文文采淳為一圭首多

者絲細少者麓皆廣尺六寸

初學記無尺字

回按韻書組總五切綬屬

小者為冕纓亦綸組也綬上去二首注綬維祥道所記唐制今

不書何以言之今人無此制久矣組今巧索之類所以穿印璽

之竅繫之於腰其文采顏色織組之工丈尺廣博祥道亦不能

畫為圖其謂漢承秦制加以雙印佩刀之飾回謂冠有纓佩有

組而綬又脩博纏於腰圍之間者內則男女左右佩謂之事佩

而左右珩璜琚瑀衝牙螭珠之佩為德佩古人先事佩後德佩

一身之所繫亦多端矣秦漢易之以印綬而組綬二字祖出玉

佩非實有所似也不過今人綵絲繩索之義而其制不傳未知

何時廢印綬不佩而祭服朝服之復古始漢明帝今人用匣盛

印以銀為龜長官花押蔽之紫袂包匣又封押之牌入印出印出牌入以公裳為綬全與秦漢不同有朝服箱幘頭匣笏囊祭朝二服之佩宋時三年一大禮用之他不過曰公裳公服紫緋綠三色而士大夫庶貴玉條環以絲為條多用道服腰之為美觀雜佩七寶篋刀便袋皮革之囊無所不有皆非古制而腰帶有玉有犀有金有魚袋有角以繫公服也寶玉犀象皮條粉飾亦無所不有世變無窮古學不講吁

### 漢朝服

東萊曰秦漢車服並見通典車未全攷服色通典節本未見

### 張良封留隨入關閉門不出

張良以六年正月丙午朔封在大功臣二十餘人之類已書今

再書者為子房不爭而善讓也史記世家良未嘗有戰鬥功高帝曰運籌帷幄中決勝千里外子房功也自擇齊三萬戶良曰始臣起下邳與上會留此天以臣授陛下陛下用臣計幸而時中臣願封留足矣不敢當三萬戶乃封為留侯良之為人與請為假王拔劍擊柱日夜爭功不決者異矣功臣表曰留文成信侯張良以庶將從起下邳以韓申徒下韓入武關決策降秦王嬰解上與項羽隙請漢中地常為計謀侯萬戶此必漢封功臣時定封之策所書也師古曰韓申徒即韓王信楚漢春秋作信都古信申同字回謂史書兩韓信焉知韓王信之信不讀曰申乎師古又謂蕭何位第一戶唯八千張良食萬戶而位過八十或才或以功勞亦無定也回謂良唯不爭而善讓故十八侯

元功位次與陳平俱不與焉史記書良從入關中在劉敬說上即日駕西都關中之後此時必無不從之理而漢書帝紀書婁敬之說在五年六月前史記高祖本紀亦同但史記良傳於從入於關之後書道引不食穀杜門不出歲餘即恐不然漢書張良傳書西都長安在六年封功臣之後自與紀違然漢傳是也史記良世家書西都關中亦在六年封功臣之後亦自與紀異漢書婁敬傳書西都關中在五年假如果然良從入關中又再從出關擊滅荼利幾幸陳執韓信乃後又再入關也通鑑書良杜門不出在六年而東萊大事記書良杜門不出於六年三月後五月前從傳從世家從通鑑不從二紀云

夏五月尊太公為太上皇

上歸櫟陽五日一朝太公太公家令說太公曰天無二日土無二王皇帝雖子人主也太公雖父人臣也柰何令人主拜人臣如此則威重不行後上朝太公擁篲迎以卻行上大驚下扶太公太公曰帝人主柰何以我亂天下法於是上心善家令言賜黃金五百斤師古曰晉太子庶子劉寶云善其發悟已心因得尊崇父號非善其令父敬已夏五月丙午詔曰人之至親莫親於父子故父有天下傳歸於子子有天下尊歸於父此人道之極也前日天下大亂云此皆太公之教訓也諸王通侯將軍群卿大夫以尊朕為皇帝而太公未有號今上尊號曰太上皇師古曰太上極尊之稱也皇君也天子之父故號曰皇不預治國故不言帝也○紫陽方氏曰史記秦始皇本紀二十六年秦

初并天下號曰皇帝追尊莊襄王為太上皇注裴駭案漢高祖尊父曰太上皇亦倣此也

史記高祖本紀注蔡邕曰不言帝非天子也索隱曰按本紀秦始皇既尊莊襄王為太上皇已有故事矣蓋太上者無上也皇者德大於帝故尊其父號太上皇也

東萊大事記曰蓋用秦追尊莊襄王之制也回謂天下豈有無父之國執皇帝雖子人主也太公雖父人臣也柰何令人主拜人臣此家令無識之言也感悟上心追尊太公家令可以賞知有君臣不知有父子一時失言衆弗之察家令可以無賞舜攝天子位瞽瞍猶存遂不拜乎拜則豈可謂之人主拜人臣乎但知以子拜父可矣家令不學漢朝蕭曹之徒皆不學武王追王

大王王季文王有舊比而况秦始皇追尊莊襄王相去未遠一時君臣懵然可勝嘆哉史漢注索隱最佳

### 立大市於長安

史記漢興以來將相名臣年表分五列自上而下第一列書皇帝元二年數第二列大事記書誅伐封建薨叛及初事大事第三列相位第四列將位第五列御史大夫位其大事記高帝六年書曰尊太公為太上皇劉仲為代王立大市更命咸陽曰長安東萊大事記書曰立大市於長安解題曰既治長樂宮復作大市朝市之制備矣○紫陽方氏曰子長此表妙不可言孟堅之為百官公卿表而無大事記殊不及子長之高而呂成公大事記之名出此帝紀所無表而出之書大市事以見蕭何堅高

祖定都長安之意前朝後市既備不可舍而他之也周以前制  
度建國左宗廟右社稷前朝後市市之說周官尤詳上旌思次  
等語尤奇陳祥道禮書可攷

### 立西市

史記大事記孝惠六年七月太倉西市

史漢記高七年皆已  
書立武庫大倉

東萊曰大市蕭何所作蓋所謂東市也太倉子長兩書東萊一  
亦但從漢紀前一書

### 附論棄市

五刑始見舜典孔傳五刑墨劓剕宮大辟漢刑法志以剕為刑  
而盡第四師古曰剕斷足也書曰五服三就孔傳謂行刑當就  
三處大罪於原野大夫於朝士於市正義謂孔本魯語魯語云

刑五而一無有隱者大刑用甲兵次刑斧鉞中刑刀鋸其次鑽  
箠薄刑鞭朴以威民故大者陳之原野小者致之市朝馬王鄭  
合市朝為一而增甸師氏穎達不然之又謂惟死罪分就處所  
墨劓剕宮無常處可就謂唐虞肉刑五流刑鞭刑朴刑三共  
為八而以流宥乎犯五刑者當亦分五等王荆公不然孔安國  
三就之說謂朝非用刑之所或重或輕或輕重之中曰三就如  
五流三居孔傳謂大罪四裔次九州之外次十里之外荆公亦  
不然以或遠或近或遠近之中為三居王晦叔然之漢志謂殺  
人者誥諸市則墨劓宮刑不於市乎說命下言伊尹弗克俾厥  
后為堯舜其心愧耻若撻於市則鞭朴之刑亦於市也世謂春  
秋片言之貶辱過市朝之撻則朝亦用刑若後世杖之朝堂監

司大守當聽杖罪人是也秦始皇記李斯燒書有敢偶語詩書棄市以古非今者族然棄市之名已見秦昭王五十二年王稽棄市此宛刑也其亦斬刑之罪也古未有絞刑今之決重杖二十處死加以索絞其頸曰絞笞杖徒流刑皆五等絞斬死刑二等絞且杖全其屍並於市曹行刑古之棄市殆非絞也墨劓剕宮皆用刀鋸以此知棄市者斬也周穆王呂刑以死罪為大辟而漢志改剕為髡師古注髡謂去膝骨頭又與斬左趾右趾異何也漢文帝十三年五月除肉刑當斬右趾及殺人先自告及吏坐受賄枉法守縣官財物而即盜之已論命復有籍笞異者皆棄市其後外有輕刑之名內實殺人師古謂斬右趾者棄市故入於死以笞五百代斬左趾笞三百代劓笞數既多死亦多

也先時笞背笞未畢而死景帝笞五百減為三百笞三百減為二百又改三百為二百二百為一百定箠令箠長五尺其本大一寸其竹也末薄半寸皆平其節當笞者笞臀毋得更人畢一罪乃得更人景紀中二年二月改磔句曰棄市勿復磔師古曰磔謂張其屍也回謂他注皆非是合以改磔為句其詔之之辭曰棄市勿復磔免張其屍也若以棄市為市則又有此刑非改而始於此時也近世笞刑五十至七十小木杖杖刑五六十至百大木杖立而杖臀學舍夏楚用竹篋徒刑五流刑三坐而杖背笞不於市杖一百始或於市徒流亦不皆市監司大守斷事不檢法但決脊杖若干刺配某州軍耳今笞杖用七數自七至百單七十一等伏而決臀視前代輕而五決或更一人則無賄

而犯私怒者不能當

古今攷卷之二十五終



